

## LA GJEOGRAFIE E I PROGRAMS SCOLASTICS

La evoluzion dal territori tai ultins 70 agns e à pal sigûr condizionât i programs scolastics su cheste materie. No son, dut câs, dome chescj cambiaments che a àn tocjât la metodologjie didatiche dai agns Cincuante a vuê. Viodin cemût.

La Leç dai 24 di Dicembar dal 1957 n. 1245 e mudà l'ordenament precedent de scuele elementâr, fasint une distinzion par ciclis didatichis e no plui par ordin inferiôr e superiôr: il prin cicli al durave doi agns e il secont trê. Ae fin di ognidun al jere proviodût il superament di un exam par passâ a chel dopo.

Lis materiis a jerin chestis

<b>Prin cicli ( 1e e 2e classe )</b>	<b>Secont cicli ( 3e, 4e e 5e classe )</b>
Religjon	Religjon
Compuartament e educazion morâl e civîl (igjene)	Compuartament e educazion morâl e civîl (igjene)
Educazion fisiche	Educazion fisiche
Esplorazion dal ambient	Lenghe Taliane
Lei e scrivi e altris ativitâts espressivis (dissen, cjant)	Aritmetiche e gjeometrie
Aritmetiche e gjeometrie	Storie, gjeografie e siencis
Ativitâts manuâls e pratichis, zûcs	Dissen, recitazion e cjant
	Ativitâts manuâls e pratichis

Vuê lis dissiplins di studi pai arlêfs des scuelis clamadis primariis a van daûr dal decret ministeriâl 254 dal 2012. Dal moment che no esistin plui lis division par ciclis, a son distribuidis tai cinc agns cun grâts diferents di dificolât e a son Talian, Lenghe Inglese, Lenghe Furlane (a sielte), Storie, Gjeografie, Matematiche, Siencis, Musiche, Art e Imagjin, Educazion fisiche, Tecnologjie, Religjon catoliche (a sielte).

No si à di passâ exams par lâ tai ciclis che a vegnin dopo, ma lis classis 2e e 5e a àn di fâ lis Provis Nazionâls INVALSI.